

Govor zamjenika predsjedavajućeg Predstavničkog doma Parlamentarne skupštine dr. Denisa Zvizdića na otvaranju nove akademske godine u Internacionalnom univerzitetu Sarajevo

Sarajevo, 2. novembar 2023.

„Uvaženi kolega i profesore Kurtulmuš,

Cijenjeni rektore Yildirim,

Drage studentice i studenti,

Poštovani prisutni,

Dame i gospodo,

Čast i zadovoljstvo mi je biti danas sa vama u jednoj od najetabliranijih obrazovnih institucija u Bosni i Hercegovini, na Internacionalnom univerzitetu u Sarajevu. Posebna čast i zadovoljstvo mi je biti sa studentima jer je to moje prirodno okruženje, jer sam univerzitetski profesor i od svih poslova kojima sam se ranije bavio i kojim se trenutno bavim, posao profesora i rad sa studentima mi predstavlja najveće zadovoljstvo. Ne postoji važnije i časnije zanimanje od prenošenja znanja na druge i rada u obrazovanju. Naravno, to nije samo privilegija, to je i velika odgovornost, jer nije dovoljno samo prenositi stečeno znanje, to nije i ne smije biti jednosmjernan proces. Potrebno je da studenti shvate, prihvate i primijene to znanje i vještine u svojim budućim poslovima i karijerama. Mi živimo u vrlo izazovnom vremenu četvrte industrijske revolucije, u vremenu kada su visoka tehnologija, internet i vještačka inteligencija postali sastavni dio naših života. Znanje je danas dostupno putem jednog klika. I to uvijek svojim studentima govorim, da ne trebaju napamet memorizirati činjenice koje su im lako dostupne. Ono što trebaju znati jeste kako pronaći prave informacije u pravo vrijeme, razumjeti ih, povezati sa drugim činjenicama i na kraju primijeniti u praksi. To je obrazovanje onako kako ga ja vidim. Kako reče Konfučije: „Učenje bez razmišljanja je beskorisno, a razmišljanje bez učenja je opasno“. U konačnici otvoren i racionalan um će sam doći do najboljih rješenja i najboljih odluka. A naša dužnost je otvoriti um mladim ljudima, naučiti ih kako da kritički razmišljaju, kako da istražuju i kako da postavljaju prava pitanja i nikada se nemojte plašiti da kažete šta vi mislite bez obzira na stav većine. Znajete da drskost nije isto što i hrabrost,

niti je lijepo ponašanje kukavičluk. Nije pretjeran i besmislen govor mudrost i nije šutnja i razmišljanje neznanje.

Međutim, pored obrazovanja važan je i odgoj. Najbolje ustanove su one koje su ujedno i obrazovnog i odgojnog karaktera. Jer ako mlade ljude nismo naučili pravim životnim vrijednostima, ako ih nismo naučili da budu moralni, solidarni, pravedni, dobri prema svojim kolegama, prijateljima, roditeljima i kompletном društvu, šta smo postigli? Mevlana Rumi kaže: „Ili se predstavljaj onakvim kakav jesi ili budi onakav kakvim se predstavljáš“. Zato vam želim poručiti sljedeće: učite, čitajte, usavršavajte se, učite strane jezike, putujte, prijavljujte se na edukacije i seminare, posmatrajte i preuzimajte najbolje prakse uspješnih ljudi, ali isto tako budite dobri ljudi, budite časni i pošteni u svemu što radite, budite posvećeni poslu i amanetu koji ste dobili, budite danas dobri studenti, dobri učenici, a sutra budite pravedni šefovi, dobre kolege i kvalitetni službenici, jer cvjetovi budućnosti su u sjemenu sadašnjosti. Čvrsto sam uvjeren da će svako društvo napredovati ako svako od nas u poslu koji radimo bude najbolji, ako taj posao dovedemo do savršenstva i ako ga stalno nadograđujemo i činimo boljim, bez obzira da li smo obični radnici ili šefovi država. Ako obični službenik bude najbolji u svom poslu imat ćemo uspješan proces u kojem učestvuje. Ako šef države bude najbolji i ako je on reper za moral i pravdu imat ćemo dobro i prosperitetno društvo. Stvar je vrlo prosta, sultan Mehmed Fatih je rekao: „Kada ubiješ razum, umrijeće moral, a ako umru razum i moral ljudi će se podijeliti. Kada ubiješ sudiju umrijeće pravda, a kada ubiješ pravdu umrijeće država“. I molim vas da ovo zapamtite. Nelson Mandela je u svojim memoarima „Dug put do slobode“ napisao da je obrazovanje najbolji pokretač ličnog razvoja, i da obrazovanje ruši sve barijere, baš kao što je on u jednom segregiranom aparthejskom društvu uspio da ukine podjele i granice među ljudima. Kako kaže Mandela „samo kroz obrazovanje dijete seljaka može postati doktor i sin farmera može postati predsjednik“, jer u životu postizete onoliko koliko ste ulagali u sebe i onoliko koliko vrijedite. Tu nema zaobilaznog puta. Tu nema prečica. Postoji samo direktni put ka ličnom uspjehu i sreći, a to je put nauke, učenja i strpljenja. Trebate znati da tzv. „uspjeh preko noći“ traje puno godina i da uspjeh može biti kada dobijete ono što želite, ali prava sreća je kada ste zadovoljni sa onim što ste dobili. Zbog toga, nikada ne gubite vrijeme tugujući nad greškama, jer su one izvor vašeg iskustva i nemojte nikada trajno spaliti mostove prema vašim

prijateljima, ljudima koji vas vole i koji vas cijene jer ćete mnogo puta morati opet preći preko tih mostova.

Na kraju, želim vam poželjeti uspješan početak nove akademske godine i poručiti vam da pažljivo saslušate predavanje kolege i prijatelja profesora Numana Kurtulmuša. Sasvim sigurno ćete naučiti. Riječ je o osobi velikog znanja i životnog iskustva. Imali smo priliku više puta u prošlosti sarađivati na raznim projektima između naše dvije prijateljske i bratske države, Bosne i Hercegovine i Republike Turske. Profesor Kurtulmuš nije samo akademski radnik i političar, on je i vizionar, a takvih je danas jako malo u cijelom svijetu. Malo je ljudi koji u političkom životu gledaju decenijama i stoljećima unaprijed, kao što on radi i promišlja, a ja se politikom bavim dugo i mogu sa sigurnošću reći da politika bez jasne vizije i cilja nije politika, jer društvo koje ne zna kojim putem želi ići je ustvari društvo koje stagnira. Hvala vam na pažnji i sve najbolje!“ (kraj)